

Caso di abuso sexual lo sigui october



ORANJESTAD – E caso penal contra e sospechoso B., kende ta wordo sospecha di abuso sexual, recientemente a bolbe wordo posponi.

CASO A BOLBE WORDO POSPONI

Investigacion cu Bon Dia Aruba a haci, ta muestra cu e tratamento a bolbe wordo posponi. Den combersacion cu abogado mr. Chris Lejuez, el a confirma cu e tratamiento di e caso no a sigui manera tabata palabra.

E motibo cu e caso a keda posponi ta pasobra cu e Fiscal cu ta encarga cu e caso lo tabata sufriendo kebrante di salud y no por ta presente den Corte. Normalmente tin Fiscal ta ocupa pa otro pero mirando cu e caso aki ya ta den tratamiento, e ta bira dificil pa un otro Fiscal tuma over.

Bon Dia Aruba por a compronde cu a keda palabra cu tratamiento di e caso lo bay ta den luna di October den oranan di mainta.

SOSPECHOSO LIBER

Ta asina cu durante tratamiento di e prome parti di e caso, caminda a pospone pa scucha cierto testigonan, despues di a scucha cierto testigonan e caso a dal un buelta di 180 grado. Abogado a pidi pa scucha dos testigo cu lo por declara di tabatin relacion sexual cu e mucha muhe (12) y tambe pa revisa yamadanan cu Recherche lo a graba, a duna su resultado.

Den combersacion cu abogado mr. C. Lejuez, el a splica cu e caso penal cu Ministerio Publico a cuminsa contra e homber B., awor a bolter despues cu a scucha e dos testigonan cu el a pidi pa scucha

y tambe despues di a revisa e yamadanan.

E homber B. ta wordo acusa cu entre Mei y Juni 2012, el a abusa di un mucha muher menor di edad. Durante tratamiento di e caso na Maart 2013, e sospechoso ta para riba cu e no conoce e mucha muher y no a papia cun'e. Segun B. ta su primo tabatin hopi contacto cu e mucha muher.

Tabatin discussion den Corte riba yamadanan entre e celular di e sospechoso pa e cas di e mucha muhe. Fiscal a bisa cu tin un cantidad di yamada print out pero no a presentan. Hues ta haya cu e print outnan ey ta hopi importante pa e caso.

Por a compronde cu di e dos testigonan cu a wordo pidi pa scucha, uno a wordo interoga y el a declara di tabatin relacion sexual cu e mucha muher. Esaki na opinion di mr. Lejuez, ta trece un otro aspecto den e caso.

Un otro parti cu tambe ta musta favorable ta e hecho cu Fiscal a manda pidi un miembro di Recherche pa presenta den Corte pa splica encuan to e cantidad di yamadanan cu a constata. Tin indicacion fuerte cu lo tabatin bruhamiento y e miembro di Recherche, kende no ta mucho familiariza cu e caso, no por a duna splicacion. Tur e desaroyonan aki a pone cu Hues a honra e peticion di mr. Lejuez pa laga e sospechoso B. liber pendiente tratamiento di e caso.

Ainda falta pa scucha miembronan di Recherche y a keda palabra cu otro luna, October, esaki ta tuma lugar. □